

## PHITHAR Ro Igobi Pha Jigigam **Yaophi**

Phithar ro igobi pha jigi è Masiphothek shii zey phi pha hanyie yi Asia hakhoi hanyie yi dayiing-dayang rey pha, “Hamangkhung-aphuui è gua pha bran shii ho phro.” Hì pha jigi pha miyaosiu è ne thampho shii lububo rek phi ro. Nyielieshii ithek ne diigkhui shii diig ne ithek ro migi shii diig rek ro. Zeypho è thamphothek shii Mua Wie Isu Masi chiang hanyie yi iy ne hòi ne wuii ruii phro ne ithek shii luthong pha sbang phi pha ji nowkhlei yi pha rek. Hìthek chiang è migiphon ne diig shii choi rone zud chid, chiih-è hìnne now chid jine awaithek ro migi khama zai chuh lei ne chai riig pha ji ro, chiih-è “Isu Masi khia ruii pha Inai shii” ithek ne lasen mua ruii phro ne now chid.

Diig pha ishak shii airo lububo rek phi pha ji ne, zeypho è de awairo thampho shii hanyie yi Masi ro brantheck duii ne sieng bone khung phro.

### **Iliing shii um pha ji**

Yaophi (1:1-2)

Hamangkhung aphuui ro giawo shii nowkhlei yi (1:3-12)

So sieng pha ji yua (1:13—2:10)

Diig pha ishak shii Masipho ro gaja (2:11—4:19)

Masipho jum nane blia (5:1-11)

Jongsha (5:12-14)

<sup>1</sup> Isu Masi ro guaphasamoy Phithar re-è—Hamangkhung-aphuui è gua ne ruii pha bran

hanyie yi dayiingdayang rek ne gai branthek dui-iné Phonthus, Galathia, Khaphadosia, Asia, chiih-è Bithynia rai pha zab shii. <sup>2</sup> Hamangkhung-aphuui pha Aphuui chiang è nathek shii ne gua ro. Ragung re-è nathek shii ne so branthek rab ro, nathek ne Isu Masi shii nuii chid, chiih-è airo ifai è nathek shii sud phi ro.

Bushun nane liijiing nathek shii ley um bo.

### *Isieng luthong*

<sup>3</sup> Cho Hamangkhung-aphuui nane gethek ro Ithong Isu Masi ro Aphuui shii laso phi bo. Nyielieshii Isu Masi Iy ne hòi pha ji è airo boh bushun è gethek shii chai iwo rab phi phro. Ji re-è gethek ro isieng luthong pha ji ley rek phi, <sup>4</sup> chiih-è gethek ne ibi riig srane Hamangkhung-aphuui è awai bran shii ruii phi pha bukho khirzey shii mua pha rek bo. Ai è ji pha khirzey ne nathek chiang shii hamangkhung hà ruii, jihà ne ashong, amua chiih-è asand pha jihà ruii phi. <sup>5</sup> Jithek ne nathek ro ro, nawaithek migi re è Hamangkhung-aphuui ro blu re-è iidohè hà khia pha giawo shii deb rek ne ruii pha ji shii nathek shii ragia rek ruii phi ro. <sup>6</sup> Hì pha chiang shii sang mage bo, nathek shii thuh lujia ishak duhug rek pha miigak ro, nyielieshii bajo ichuathek chuajan pha ji nathek è diig rek ro. <sup>7</sup> Ithek è rek noh jine nathek ro migi ne jichak rone khagi rek phi pha. Nyie nyamua mua pha san shii rangde bai shii chai; chiih-è nathek ro migi ne san è de igong bajo muna ro nyie shii ne chai chid phro, ji-è hîne zud mua, chiihphado nathek ne Isu Masi khia pha inai shii chiong nane biisiie chiih-è ilab mua ruii

phro. <sup>8</sup> Nathek ne aishii adoh, jimagunde nathek ne aishii miie, nathek ne thuh adoh ba jimagunde nathek aishii migi rek. Ji-è nathek ne nyie miyaogamthek è ayao mua pha boh biisiethek pha lubo shii nathek sang ro, <sup>9</sup> Nyielieshii nathek ro nyie migi aishii um pha chiang è nawaithek ro luruakthek pha giawo mua ro, <sup>10</sup> Hì pha giawo chiang shii chaigthek bajo gayiig ne sow ne id, nyie Hamangkhung-aphuui è nathek shii phi pha lasen chiang shii ithek è chaig marui. <sup>11</sup> Ithek ne ji pha ishak ne khuchung chiih-è khi-èrek ne thog ruii pha bidiang ne sow marui.\* Hì pha ishak ne Masi ro Ragung ithek shii um pha ji è hiòg ro, Masi ne biisiie shii luagieng pha chiang diig shii zud phro ne yao. <sup>12</sup> Hamangkhung-aphuui è ji pha chaigthek shii khia ne ithek blia ne awaithek shii phua pha arek ro, hamang è thoh pha Ragung So pha blu è Hamangkhung-aphuui ro Mua Wie ne muapho è yao pha jine thuh nathek è yoi pha chiang, ithek è yao marui pha manathek ne nathek ro ro. Hìthek pha manathek shii ne hamangkhliiethek rangde gao pha yang.

### *So sieng pha ho*

<sup>13</sup> Ji-è chiihphado, nathek khani ne blia rek pha saro bo. Isu Masi khia mage shii nathek shii phiramuii pha khirzey shii nowbthan ne nawaithek ro luthong shii zab khriig rek ne ruii bo. <sup>14</sup> Hamangkhung-aphuui shii nuii bo, chiih-è nathek sieng pha jine nathek è athieg ba shii chidthek shii um pha jihà arab yi

---

\* **1:11** 1:11: ishak thog magey shii chiih-è jine khi-è rek ne thog ruii; din bran hanyiega chiih-è ai wuii ruii shii.

rabo. <sup>15</sup> Ji phachiang shii, nathek shii ho pha Hamangkhung-aphuui ne so duiine, nathek è nyie rek pha jine so rek bo. <sup>16</sup> Jigigam shii yao, “So rek bo nyielieshii gune so ro.”

<sup>17</sup> Nathek è Hamangkhung-aphuui shii sia mage shii, Nathek ne aishii Aphuui rone ho, hanyie è zab pha bran shii ne zab è nyie rek pha ji shii ò è chua; ji-è chiihphado, nathek ichiih sohnyiak shii sieng pha jine aishii ilab rek bo. <sup>18</sup> Nathek ro blangthek è nathek shii adunmey pha lumuii chai hà phi muii pha ji è ichad rek phijong rone nathek ne thieg; hìne muadun pha liiman nane san è asi ro. <sup>19</sup> Hì ne igong khlem hanyie ne shiishaiduii duiine ichiig oi pha Masi ji ro. <sup>20</sup> Aishii ne Hamangkhung-aphuui è sohjambling azen ba pha ibi gua chiih-è iidohè pha inai shii nathek chiang shii khia phi ro. <sup>21</sup> Ai chiang è nathek hamangkhung-aphuui shii migi rek, hanyie aishii iy pha ji è hòi yi ne aishii biisiie phi; chiih-è ji-è nathek ro migi nane luthong ne Hamangkhung-aphuui shii um ro.

<sup>22</sup> Thuh shii nathek ro nuii pha zai è nathek ne nawaithek shii igang rek ne chiih-è gai migiphothek shii isiie è miie bo. Nawaithek lubu rog shii wiang ne nawaithek chung miie rai bo.<sup>†</sup> <sup>23</sup> Hamangkhung-aphuui ro isieng nane idang pha miyaogam è nathek shii ne hanyie è iy pha ji è asi pha a-iy pha aphuui-amuui ani duiine chiih-è giak din phi phro. <sup>24</sup> Jigigam shii yao, “Zab pha bran ne saing duiine ro,

---

**1:16** 1:16: Lew 11:44,45; 19:2    <sup>†</sup> **1:22** 1:22: zab nathek ro lubu re-è; giak jigi zey shii um lubu sang rog.    **1:24** 1:24,25: Aij 40:6-8 (LXX)

chiih-è zab ithek ro biisiie ne jabiing pha  
iibuathek duiine ro.  
Saing ne gohdun, chiih-è iibuathek ne chiihdun,  
<sup>25</sup> Jishii Ithong miyaogam ne idang raidun.”  
Hì pha miyao ne nathek shii yaojong pha Mua  
Wie ji ro.

## 2

*Isieng lubao nane so brantheck*

<sup>1</sup> Chiihphado, zab pha awie shii nawaithek ruang rek bo; biidiie chiih-è lawasdai chiih-è miegriie chiih-è magak-riing pha nyuak ne oi chid rabo. <sup>2</sup> Wo giak pha aniphiingthek duiine idang igang pha ragung niu shii gahang-hang bo, ji-è nathek ji niing arone giawo shii sieng mua ruii phro. <sup>3</sup> Jigi shii yao, “Ithong ne khama bushun nawaithek ne dohjong ro.”

<sup>4</sup> Ithong shii wuii bo, isieng lubao shii brantheck è adunmey rone snai pha jine Hamangkhung-aphuui è igong rone yao ne gua jong ro. <sup>5</sup> Isieng lubaothek duiine wuii ruii bo, chiih-è nawaithek shii ne luruak pha Jewthek misiahò rung pha kho yi bo, khhì so phabithek è duiine nathek ne blia rek srane Isu Masi chiang è Hamangkhung-aphuui yie spho khlem rek bo. <sup>6</sup> Jigigam shii yao,  
“Gu è igong lubao shii gua,  
nyie yi gune Zion shii iiriing lubao ruii muii  
pha duiine ro;  
chiih-è hanyie è aishii migi rek khuchungde  
awo phro.”

**7** Nathek è migi rekpho shii ne hìpha lubao ne bajoboh igong rey ro; jimagunde hanyie è migi arek pho shii ne:

“Khi pha lubao shii rungpho è adunmey rone  
snai muii pha ji ne  
zab è bajo miigak rey din ro.”

**8** Chiih-è gai jigigam shii yao,  
“Hì pha lubao ne bran shii kham yi,  
chiih-è lubaoboh shii ne ithek shii chiih yi  
pha ro.”

Ithek ne kham dun nyielieshii ithek ne miyaogam shii migi arek ro; hìne zai Hamangkhung-aphuui è ithek ro yang pha ji ro.

**9** Jishii nathek shii ne gua pha iiriing ro, Saja pha phabithek, so brantheck, Hamangkhung-aphuui awairo bran, hanyie è nathek shii igitia è awairo anomuluii pha muchuang hà noh phi, chiih-è Hamangkhung-aphuui ro anomuluii blia ji yao yi pha guajong ro. **10** Luang jia pha ishak shii nathek ne Hamangkhung-aphuui ro bran asi, jishii thuh shii nathek ne airo bran ro; luang jia shii ne nathek ne Hamangkhung-aphuui ro bushun athieg, jishii thuh nathek ne airo bushun shii muage ro.

### *Hamangkhung-aphuui ro khiaothek*

**11** Gu iijiakthek wo, ichiih sohkhung pha athieg pha bran nane fuang pha bran duiine! Gu nathek shii khung. Nyie yi idang luruak shii suang rek

---

**2:7** 2:7: Chng 118:22    **2:8** 2:8: Aij 8:14,15    **2:9** 2:9: Mul 19:5,6;  
Aij 43:20 (LXX); Mul 19:5; Iphy 4:20; 7:6; 14:2; Thd 2:14; Aij 43:21;  
Aij 9:2    **2:10** 2:10: Hos 2:23

pha siu è yang pha ji shii aphi rabo. <sup>12</sup> Ithek è nathek shii awie rone nin ruii shii nathek ro ziig ne migi arekpho duchoi shii bajo wie rek bo, ithek ne nathek ro wie blia ji shii thieg ruii chiih-è ai wuii ruii pha inai shii Hamangkhung-aphuui shii chiong ruii phro.

<sup>13</sup> Ithong chiang shii nawaithek shii zab pha tharothamang riichai shii phi muii bo: Hanyie yi bajoboh riichai um pha Bisiu, <sup>14</sup> chiih-è hanyie shii awie pha rekpho shii lago phi chiih-è hanyie è wie rek ji shii chiong ruii pha aishii ne bow ne ruiijong pha badri de phi muii bo. <sup>15</sup> Chiih-è Hamangkhung-aphuui è nathek shii ne nathek è wie rek pha ji è bi-łephiing ro thaluui pha miyao shii aro yi pha rek yang ro. <sup>16</sup> Ichad bran duiine rai bo, nathek ro ichad shii nyie awie pha ji shii cheg yi pha akho rabo, jishii Hamangkhung-aphuui ro khiaothek duiine rai bo. <sup>17</sup> Zab shii ilab rek bo, gai migiphothek shii miie bo, Hamangkhung-aphuui shii rum bo, chiih-è Bisiu shii ilab rek bo.

### *Masi ro diig pha miiriig ji*

<sup>18</sup> Khiaothek nawaithek ne nawaithek musphotheuk shii phi chid srane zab ilab rek rone doh yi bo, hanyie yi jum nane wie shii asi bie pha, jishii hanyie yi sua ji shii ilab rek bo. <sup>19</sup> Hamangkhung-aphuui è nathek shii hìne khirzey phi ruii phro, ichiig oi pha diigcheo ne riie pha ji shii zud arone, nyieliieshii nathek ne ai è yang pha ji shii nuii phi ro. <sup>20</sup> Na è asi pha blia rek shii zuangthek shii zud arone wie ibeng nyie mua mage phlei? Jishii na è rangsua rek mage shii rangde zud arone, ji shii ne Hamangkhung-aphuui è khirzey phi ruii phro.

**21** Hì ne ji ro Hamangkhung-aphuui è nathek shii hojong ro, Masi awai de nathek chiang shii diig rek ne chiih-è nathek shii miiriig pha thoh marui, ji-è nathek ne ai è lua pha ji luagieng mua ro.

**22** Ai ne layog arek, chiih-è hanyie è ai semthek è biidiie yao pha ayo ro. **23** Aishii magak-riing mage shii, ai è magak-riing rog shii achang; ai diig mage shii, ai è akhui ro, jishii airo luthongthek ne giang Chua pha Hamangkhung-aphuui shii rui.

**24** \* Masi awai è gethek ro layog ne awai siu shii bai hà han, ji-è gethek layog shii iy ne giang shii sieng mua. Hì ne airo saduui è gethek ne gang ge ro. **25** Nathek ne awaithek lumuui è san dun pha shiishai duiine ro, jishii thuh shii nathek ro Brogpho nane luruakthek shii Gayiig pha ji shii lua yi pha iidoh noh ro.

### 3

#### *Yiythek nane geythek*

**1** Ji duiine nathek yiythek ne nawaithek ro geythek shii phi muii bo, ji-è ithek è hanyie yi Hamangkhung-aphuui miyaogam shii migi arek arone, nathek ro ziig è ithek shii yang ne migi rek yi phro. Nathek ne miyaogam yao chid pha miigak asi ro, **2** nyieliieshii ithek ne naro ziig ji khama igang nane ziig shii nuii chid phro ne riig ruii phro. **3** Nathek ne nawaithek shii khie rab pha nathek ro khaziang shii rab pha ji shii, chiih-è nathek yua shii khow pha mukho shii, chiih-è nathek guii pha yung shii fuang è chia pha nong

---

**2:22** 2:22: Aij 53:9    **2:23** 2:23: Aij 53:7    \* **2:24** 2:24,25: Aij 53:5,6 (LXX)    **3:1** 3:1: Iphi 5:22; Khol 3:18    **3:3** 3:3: 1Thi 2:9

ayie rabo. <sup>4</sup> Ji phachiang shii, nathek ro khie jine nawaihek ro iliing pha izai shii rey ne rai bo, jum pha idang pha khie nane liijiing ragung, nyie yi Hamangkhung-aphuui mieg moe shii ne zab è ibid um ro. <sup>5</sup> Buyo pha giang hò-amuiithek hanyie yi Hamangkhung-aphuui luthong ruii pho ne awaithek yi geythek shii phi pha ji è awaithek shii khie rab. <sup>6</sup> Sarah ne ji duiine ro; ai ne Abraham shii nuui srane aishii awai ithong rone ho. Nathek ne wie rek ne nyie shii arum arone nathek ne airo dimithek ro.

<sup>7</sup> Ji duiine geythek nawaihek wie gao pha rog shii yiythek rog shii rai bo, ji-è ithek ne nathek è muna zia phro. Ithek shii ilab è yua bo, nyielieshii Hamangkhung-aphuui ro chai pha lasen jine ithek de nathek rog shii mua ruii phro. Ji rek bo ji-è nathek ro misiathek rog shii hanyie è afu-afi arek gieng phro.

### *Rangsua rek pha chiang shii diig*

<sup>8</sup> Jong sha: Nathek zab shii ò ziig nane ò thanthek ji um bo; nawaihek gai chung miie rai bo, chiih-è nawaihek gai chung bushun nane jum rek rai bo. <sup>9</sup> Awie pha ji shii awie pha iidoh aphi rabo, chiih-è thamai pha ji shii iidoh athamai rabo; ji pha chiang shii khirzey phi bo, nyielieshii ai è nathek shii ho mage shii Hamangkhung-aphuui è khirzey phi pha rone sbang rek pha jine hì ro. <sup>10</sup> Jigigam shii yao,

“nathek ne chai shii lubo rek yang arone  
chiih-è wie ishakthek riig yang arone,

nathek ne awie pha ji ayao pha  
chiih-è biidiie yao pha ji shii gak bo.

**11** Nathek ne awie pha ji è khid srane wie rek bo;  
nathek ne liijiing pha chiang shii nawaiithek  
ro zab lubu è bidiang bo.

**12** Chiih-è Ithong è giangtheke shii wie è riig  
chiih-è ithek ro misiathek shii yoi phi;  
Jishii ai ne hanyie è awie pha rekpho shii ne  
suang rek.”

**13** Nathek è nyie wie ji shii bajo rek yang arone  
hanyie è nathek shii mua mage phlei? **14** Nathek  
ne nyie rangsua rek shii rangde nathek è diig rey  
arone, nathek ne khama sang ro! hanyie shii  
arum rabo chiih-è sam-adiig chid rabo. **15** Jishii  
nathek ro lubuthek ne Masi chiang shii boh ilab  
um bo, chiih-è aishii ne Ithong rone ilab rek bo.  
Nathek shii um pha luthong ji pha chiang shii  
yao bo è hanyie è lia ruii shii chang pha zab  
ishak ne khriig rek bo, **16** jishii jum nane ilab  
rog shii rek bo. Nawaiithek ro lubunow shii sang  
rek bo, ji-è nathek shii makhak-riing mage shii,  
Masi ro luagiengphothek rone nathek ro wie ziig  
shii hanyie è awie rone yao mage shii ithek è  
nyie yao pha ji shii biwo rey ruii phro. **17** Hì  
ne Hamangkhung-aphuui è yang arone, awie pha  
rek pha ji diig shii ne wie rek pha ji shii diig  
pha ji wie ba ro. **18** Nathek shii Hamangkhung-  
aphuui hà noh pha bran wie ne layogphothek  
lakhung shii Masi ne luang jia shii idang pha  
layog chiang shii iy dun.\* Ai ne siu shii ne iy

---

**3:14** 3:14: Mth 5:10    **3:14** 3:14,15: Aij 8:12,13    \* **3:18** 3:18:  
iy dun; bajo jigizeythek umdiig.

dun, jimagunde ragung shii ne isieng rabjong ro,  
<sup>19</sup> chiih-è airo ragung è rai srane ai wuii dun chiih-è binmuii pha ragungthek shii yua. <sup>20</sup> Jithek ne hanyie è Hamangkhung-aphuui shii anuui pho ro ragungthek ro chiih-è Hamangkhung-aphuui ne ithek shii lubu phiang è khan pha ishak shii Noah ne awairo run rab ramuui ro. Run shii ne iujia bran ro—zab ne mileo ro—ithek shii ne kho è ragia rey ge ro, <sup>21</sup> hanyie shii ne khowo pha cheb ji shii hiòg ro, hanyie nathek shii thuh ragia rek phi. Hì ne siu pha izea sud pha ji asi ro, jishii wie lubunow ji è Hamangkhung-aphuui è sbang rabjong ro. Hì ne Isu Masi hòi pha ji è nathek shii ragia rek ge ro, <sup>22</sup> hanyie ne hamang hà dun ne Hamangkhung-aphuui ro phazoi shii um ne, zab pha hamangkhliiethek shii nane hamang pha riichaithek chiih-è bluthek shii bohko muii ro.

## 4

### *Chai lai dun*

<sup>1</sup> Masi è siu shii diig dang shii, nathek ne nawaiethek shii aishii um pha nowthek rog shii ò ji shii chuh rek bo; nyeliieshii hanyie magunde siu shii diig re pho ne layog rog shii oi sha phro.  
<sup>2</sup> Chiihphado thuh è, nathek ro sohnyiak shii sieng pha gai jine tharothamang è chidthek shii asi pha Hamangkhung-aphuui è yang pha ji è phrai bo.  
<sup>3</sup> Nathek ne buyo migi arek pha branthek è rek pha duiine cho pha ishak muajong ro. Nathek ne awie pha ziig, chid, biwo blia, chieniing, chiih-è jangbangthek shii misiasia pha ji è ne khijai shii sieng ro. <sup>4</sup> Chiih-è thuh nathek ne ithek rog shii

jabiing nane thaluii sieng pha ji duiine adog mage shii migi arek pho ne wieng dun, chiih-è ji-è ithek ne nathek shii makhak-riing ro. <sup>5</sup> Jishii ithek ne awaithek ro sasab ne Hamangkhung-aphuui shii phi chid phro, hanyie ne iy pha nane isieng shii chua pha ideb ro. <sup>6</sup> Ji è iyjong pho shii de Mua Wie ji yuajong ro, zab shii chuajong pha duiine hanyie ithek yi siu shii sieng shii chuajong ro, ji-è ithek ro ragung chai shiine Hamangkhung-aphuui è rai pha duiine ithek sieng mua ro.

*Hamangkhung-aphuui ro lasenthek pha wie gayiigphothek*

<sup>7</sup> Zab pha manathek jong shapha ne nui ro. Sia mua pha nathek ne zud chiih-è riigbthan bo. <sup>8</sup> Zab pha lakhung shii, lubu phi ne nawaithek jia chung shii miie bo, nyieliieshii miie è bajo layogthek shii cheg phi ro. <sup>9</sup> Nyie de suanghàw arek pha nawaithek hò ne nawaithek chung hong phi bo. <sup>10</sup> Zab jia ne, Hamangkhung-aphuui ro yoyo lasenthek shii wie gayiig rai bo, ai ne Hamangkhung-aphuui è mua pha lasen wie jine gaithek shii wie rek pha kho bo. <sup>11</sup> Hanyie yuapho ne Hamangkhung-aphuui ro muathek yua chid phro; hanyie è blia rekpho ne Hamangkhung-aphuui è ithek shii nyie phi pha ji shii chua rog shii blia rek chid phro, ji-è zab pha manathek ne hanyie shii biisiie nane blu idang nane idang um pha Isu Masi chiang è Hamangkhung-aphuui shii chiong mua phro. Amen.

*Migiphoo duiine diig*

**12** Gu iijiakthek wo, nathek ne riie pha chai pha ji diig shii arey pha jine nathek shii rey rone awiengpphleg rabo. **13** Ji pha chiang shii nathek ne Masi ro diigthek ji thang mua rone lised bo, ji-è airo biisiie khia mage shii nathek ley lubo um bo. **14** Nathek shii makhak-riing arone nathek ne sang bo, nyieliieshii nathek ne Masi ro luagiengpho ro, hiphä miyaosiu è ne biisiiethek pha Ragung, Hamangkhung-aphuui ro Ragung ne nathek lakhung shii rai muii ro. **15** Na shii diig rey pha ji ne, hine nyieliieshii sgohpho rone chiih-è mugopho rone chiih-è suruui rone chiih-è gai bran shii blia shii diig rek rone arey yi rabo. **16** Jishii, na è diig rek nyieliieshii nathek Masipho ro, jine awo rabo, jishii na ne Hamangkhung-aphuui shii laso phi nyieliieshii na ne Masi ibeng yie phro.

**17** Chua pha jao pha ishak ne thog sharuui ro, chiih-è Hamangkhung-aphuui awairo bran ne igobi chua ruii phro. Hì ne gethek rog jao arone, Hamangkhung-aphuui ro Mua Wie shii migi arekpho rog ne khi-è rey ba pharai lei?  
**18** Jigigam shii yao,

“Hì ne wie bran shii ragia rek pha ne diig ro;  
 chiihphado, hamangkhung-aphuui oipho nane layogphothek shii nyie rey ruii phlei?”

**19** Ji-è chiihphado, hine Hamangkhung-aphuui ro yang rone hanyie è diig rekpho ne, awaithek ro wie bliathek re-è awaithek ro rabpho shii hanyie è idang awairo sbang shii zab rek pha ji shii phi muii bo.

## 5

*Hamangkhung-aphuui ro ibrog*

<sup>1</sup> Hanyie, gune gui è kho, nathek duchoi è charch pha dukhothek rone khung phro. Gune Masi ro diig pha khagi ro, chiih-è gune khia ruii pha biisiie ji thang ruii phro. Gu nathek shii khung <sup>2</sup> Hamangkhung-aphuui è nathek shii phi pha ibrog pha brogphothek rek ne, Hamangkhung-aphuui è nathek shii yang pha duiine nawaiithek è yang ne ithek shii gayiig bo, chiih-è ayang pha arek rabo. Nawaiithek ro blia rek bo, igong mua bie pha arek rabo, jishii nawaiithek blia shii lubu è rek sbhang bo. <sup>3</sup> Nathek shii gayiig yi pha phi pha lakhung shii bohkhoh pha abidiang rabo, jishii ibrog pha miiriigthekek rek bo. <sup>4</sup> Chiih-è boh Brogpho khia mage shii, nathek shii ne khuchungde asand pha ikhilieng biisiie rago ji mua ruii phro.

<sup>5</sup> Ji duiine filiao bran nathek de nawaiithek shii dukhothek shii phi muii bo. Chiih-è zab nawaiithek ne yung guii pha duiine jum guii bo, nawaiithek jia chung shii blia rek rai bo; jigigam shii yao, “Hamangkhung-aphuui è wiangwe pha ji shii gidieg rek ro, jishii jum shii haro rek.” <sup>6</sup> Chiihphado, Hamangkhung-aphuui ro riichaiboh pha wad iliing shii, nawaiithek shii jum rek bo, ji-è ai è nathek shii awairo wie ishak shii nathek shii lakhung chiing ruii phro. <sup>7</sup> Nathek ro zab pha samdiig ne ai rog shii ruii muii bo, nyielieshii ai è nathek shii gayiig phro.

<sup>8</sup> Nowbthan bo, wie riig bo! Nathek ro suang, sakhathong, chiih-è hanyie shii magunde chie pha sow ne bargi duiine shand ne lua muii ro.  
<sup>9</sup> Nawaiithek ro migi shii chuh rek ne aishii gak bo, nyieliieshii nathek ne thieg zab pha sohjambling pha gai migiphothek ne ji duiine ichua diigthekek rek ro. <sup>10</sup> Jishii nathek è diig ne iujia pha ishak shii, Hamangkhung-aphuui ro zab bushun hanyie è nathek shii awairo idang pha biisiie Masi rog shii ò thang pha ho, awai è nathek shii khriig rek phi ne nathek shii chuh rek phi, gang rek phi, chiih-è asi dang pha rek yi pha rab phi ruii phro.  
<sup>11</sup> Aishii ne idang pha blu um bo! Amen.

### *Idohhè pha salamthek*

<sup>12</sup> Gu è hìpha jigigam dum nathek shii zey pha jine Silas è nongphi, hanyie shii gu è isiie Masipho duiine gu è ilab rek pha ji ro. Gune nathek shii lububo rek phi chiih-è hìne Hamangkhung-aphuui ro izai bushun rone khagi rek phi pha yang muii ro. Ji shii chuh è riu bo.

<sup>13</sup> Babylon\* hà um pha charch de, Hamangkhung-aphuui gua pha ji è, chiih-è gu dufuii Marg de, nathek shii salamthek thoh ge ro.  
<sup>14</sup> Nawaiithek chung Masipho pha miie è khichiug rai bo. Hanyie yi Masi ro bran lei ne nathek rog shii liijiing um bo.

---

**5:12** 5:12: Blk 15:22,40    **5:13** 5:13: Blk 12:12,25; 13:13; 15:37-39;

Khol 4:10; Phlm 24    \* **5:13** 5:13: Babylon: Dog pha jigi duiine, hìpha jigi ne Rom hè de yao.

**Iwo Surua Mua Wie Pha Bible  
The Holy Bible in the Bugun language of India, first  
Bible translation**

copyright © 2023 The Word for the World International

Language: Kho (Bugun)

Contributor: The Word for the World Southeast Asia

The New Testament in Bugun

published as

**IWO SURUA  
Mua Wie Pha Bible**

The Word For The World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-08-31

---

PDF generated using Haiola and XeLaTeX on 21 Feb 2024 from source files

dated 31 Aug 2023

02eb8fa0-132d-5640-b9e8-5b17ef13756c